

# Reglar da nov la psichiatria d'uffants e giuvenils

La regenza recumonda da refusar l'incumbensa parlamentara da deputada Sandra Locher Benguerel (ps Cuira)

DA MARTIN CABALZAR

■ **La deputada socialdemocratica Sandra Locher Benguerel, sustegnida da 33 consignants, vul incumbensar la regenza da reglar da nov l'organisa-ziun da la psichiatria d'uffants e giuvenils en il Grischun. La regenza è dentant da l'avis che questa incumbensa na cuntetgna nagins aspects che n'èn betg già enconuschents ed er già in-stradads e propona perquai da refusar l'incumbensa.** En connex cun la revisiun totala da la lescha per promover la tgira da persunas malsaunas ha il cussegl grond discutà schebain ils servetschs psichiatics dal Grischun duain furnir «en moda subsidiara» u da princip servetschs da la psichiatria d'uffants e giuvenils. La finala haja il cussegl grond decidì da stritgar il pled «subsidiar». Uschia pon ils servetschs psichiatics metter a disposiziun da nov la medema purschida sco la psichiatria d'uffants e giuvenils dal Grischun. Tenor *Sandra Locher Benguerel* n'èn dentant ni la soluziun subsidiara sco fin ussa ni ina nova soluziun cun dus purschiders ni in plazzament extrachantunal betg optimal. Il scenari il mender pussaivel saja ina concorrenza che mainia a structures parallelas ed inefficientas che na satisfetschian la finala era betg als basgns dals uffants e giuvenils.

## Suandar las recomandaziuns

Il fanadur 2014 ha prof. dr. *Susanne Walitza* fatg in'expetisa correspudenta per incarica da la regenza grischuna. En quella vegnia mussà scenaris pussaivels e proponì soluziuns ch'èn raschunavlas per la psichiatria d'uffants e giuvenils dal Gris-chun sco era da sclerir tant avantatgs sco dischavantatgs. Sin fundament da las re-comandaziuns da Walitza duai la regen-



La regenza n'è betg pronta d'approvar l'incumbensa Sandra Locher Benguerel damai che quella saja già proximamain enferrada.

FOTO O. ITEM

za reglar l'organisa-ziun da la psichiatria d'uffants e giuvenils dal Grischun cun l'intent da promover il meglier pussaivel ils interess dals pertutgads. La finamira saja da survegnir in tractament che è adattà a la vegliadetgna dals clients, cun far ina clera separaziun tranter creschids e giuvenils. Ins possia bain trer a niz sinergias pussaivlas sin il sector organisatoric ed administrativ, ma ina direcziun operativa independenta da vart dals me-

dis, da la tgira e da la pedagogia stoppia vegnir resguardada. Era stoppian vegnir scleridas e regladas correspudentamain las dumondas dal program necessari, da las localitads e da las basas legalas necessarias e davart ils custs da gestiun e d'investiziun.

## Tschertgar cuminaivlamain soluziuns

L'intent da stritgar il pled «subsidiar» en la nova lescha saja stà quel d'intimar la

psichiatria d'uffants e giuvenils dal Gris-chun ed il Servetsch psichiatic dal Gris-chun da tschertgar cuminaivlamain soluziuns e da ponderar co la largia existenta en il provediment staziunar da giuvenils pudess vegnir eliminada. Il bassegn temporar per letgs staziunars possia però vegnir cuvri cun inscriber en la Clinica privata Littenheid che figureschia sin la glista dals ospitals grischuns. Or da vista da la regenza po quai dentant mo

esser ina soluziun transitoria. La finamira stoppia esser da pudair garantir il provediment psichiatic dals giuvenils dal Grischun entaifer il chantun. Per pudair realisar la staziun da giuvenils mancanta en il chantun saja inevitabel d'approfundar la collavuraziun tranter ils dus furniturs da prestaziuns, scriva la regenza.

## Il nov concept

Per l'elavuraziun d'in concept davart il provediment psichiatic per uffants e giuvenils recumonda la regenza da realisar las recomandaziuns cuntegnidas en l'expertisa «Walitza» sco basa da parten-za. Per la regenza èsi en quest connex necessari d'avair ina clera separaziun locala dals creschids e dals giuvenils sco er ina direcziun independenta per cuntanscher ina qualitat optimala da las structures, dals process e dals resultats dal tractament d'uffants e giuvenils cun disturbis psichics.

In program meglier pussaivel da la psichiatria d'uffants e da giuvenils en il senn da las recomandaziuns da l'expertisa «Walitza» sco era la finanziaziun da la staziun per giuvenils cun il program da las localitads necessarias che vegnan messas a disposiziun tenor las basas legalas existentas sche las duas institu-ziuns èn prontas da collavurar. La regenza ha, uschenavant che quai fiss già inditgà, la pussaivladad e l'intenziun d'im-pedir en il rom da sias cumpetenzas structuralas parallelas grazia a directives correspudentas en sias finamiras da proprietad.

Tenor la regenza na cuntegn l'incumbensa la finala nagins aspects che n'èn betg già vegnids enconuschents e prendids già oz per maun. La regenza propo-na perquai al cussegl grond da refusar l'incumbensa Locher Benguerel.